

度

支

奏

議

度支奏議目錄

湖廣司二卷

題覆潞藩免撥贍田疏

題覆惠藩奏留表箋公賞疏

題覆湖廣按臣查叅未完京邊疏

覆斬民張効勳陳奏疏

覆 惠 桂兩藩贍田并新餉照石偏累疏

題覆御史譚汝偉衡民萬苦疏

題議桂惠一藩贍田四萬疏

原缺

垂憲萬世矣本年七月二十八日奉

聖旨該部議妥具覆欽此欽遵抄出到部蒙批

司會同十三司妥議題覆奉此隨該本司

十三司官備關先後疏抄展轉熟計事關

國體誼屬親王可否取與難以輕議似當開陳

義權衡情理仰候

聖裁其善後機宜斟酌調劑責成撫按奉

旨頒行務求經久之策等因呈堂蒙批題覆奉批到

司案呈到部爲照

累朝封建錫有贍田

殊恩出自常祿之外多寡從無一定之規今

惠桂兩王抵國經年贍田開報遠不及額楚中

臣議搜括則楚封獨多悉索殆盡言加派則

困已極剝削難堪按臣因而有議哀

潞贍之請矣蓋以每藩二萬之額奉有

屢旨未敢議減而協濟搜括尚無成數則彼此哀

導賢王以克讓之美此窮而思變計議不

已也乃歷查惠桂兩王累疏咸陳楚中田

多隱期石力搜是搜括無遺之說猶未見
二王故臣部前疏等議令楚甸隣省諸臣力行
助徐議哀讓奉有

欽依咨行各省去後未有回文而

潞府驚聞懇籲之疏至矣哀控千言極陳贍業關
繫命脉賚予特出

先朝世歷一傳無故削土拂

諸聖在天之靈啓日後凌競之漸且云分封在衛全
資楚產而田有高下賦有重輕名雖四萬

福例三萬頃三分起科得租六萬兩者數適相
其不平之情已溢于言表矣今日之事勢在兩
難畫當歸一如伸臣部前議搜協並行得獲
事新舊便可相安倘欲權通損益則亦有臣部
前疏之議在蓋

潞王既稱田多租薄矣若查有田在遙遠鞭長難
及者視爲雞肋而量捐之則尺寸之壤亦孰不
可爲 一 二藩之資乎是在

賢王自昭令名耳詎屬親親不容遠間事關

國體何敢擅專惟祈我

皇上睿機審斷恩義兼盡耳至于三戶子遺之膏血
五股內官之橫徵騷擾地方允爲民患楚中當
事稔嘗其苦潞田還楚之議或亦繇茲啓爨先
經奉

旨嚴禁更當再行申飭奉以從事撫按諸臣協力調
劑仰副

皇上展親恤民德意庶一時通洽而萬禩無弊矣既
經該藩府具奏前來相應覆

請恭候

命下臣部行文湖廣江西福建廣西各巡撫并各都
察院行各該巡按御史一體遵奉仍行河南撫

臣轉行

潞府長史司啓

王知會施行

崇禎元年九月初九日具

題本月十五日奉

聖旨二藩贍田着各該撫按官搜括協濟不得議及

潞藩有虛

皇祖優薦親親之意錢糧有司徵解已有明旨撫按
再申飭行欽此

題覆 惠藩奏留表箋公費疏

題爲懇乞

天恩篤念親親 賜留

表箋公費地土以全藩體以隆

聖眷事湖廣清吏司案呈崇禎元年八月二十八日
奉本部送戶科抄出

惠王常潤奏前事內稱臣奉

命封荆因與遼宗同城荷蒙

先帝鴻慈予臣 詔勅一應

朝賀常儀封婚定例悉聽臣藩啓

請約束是以臣入國時舊總理 光澤王術堦卽將

遼藩置備 表箋公費三倉等處地租一千五

百餘兩啓進與臣徵抵代貢 表箋之需奈何

有司欺臣微弱素窺得慣奪此公費虛湊贍數

第臣入國一載贍額百無一有官眷萬口嗷嗷

食用尚難措辦正自治不暇奚代遼藩費用以

若所爲則遼藩 表箋應令有司代進矣且臣

未出都時已聞搜有遼遺新淤共二萬頃今又

一載有餘反只六千頃尚欲議分兩藩昔何處
今何縮臣竟不知其解揆厥所繇皆因強宗勢
豪賄弊侵欺有司市恩容隱今又剝臣之肉鬻
臣之瘡堂堂

帝子而受有司侵剝真可謂痛哭流涕者也其如
天高莫控誰與我矜且臣贍田六奉

明綸煌煌

天語墨跡未乾有司如同故紙置若罔聞此誠

詔書來但掛壁郡縣示如霹靂臣實莫敢誰何惟自

扼腕吞嗟束手以待斃耳夫以光澤總理猶
仍二百年之公費徵用無異卽前搜

潞福贍田未嘗奪此益彼臣旣代進

表箋反不容臣管業是蔑親王不如一郡爵獨不
思臣係

天潢的派

當宁懿親乃竟視爲癢瘤朋比欺凌一何至此極耶
伏乞

皇上篤念親親

特勅該部速咨撫按衙門清還前項地土以充公費
再懇嚴頒

俞旨督令速搜贍田以資日用庶藩業早襄而

聖眷益隆矣崇禎元年八月十八日奉

聖旨該部知道欽此欽遵抄出到部送司案呈到部

案照遼莊王之子憲燾因事被削其原

賜莊湖變價入官惟三倉小河等洲是撫按題

請議留管理府事者充爲

朝貢表箋之費先年廣元王憲燾奉

勅管理府事傳子術珣薨逝無嗣

光澤王術瑀以倫序相當奉

勅管理遼藩宗事原留倉洲俱各題

請勘合相仍管業在案今

惠藩分封荆楚適與遼宗同城請

勅約束各宗故抵國之後 光澤王卽將地租照數

啓進 朝賀表箋俱係 惠府代進是以

親王統郡藩三倉等租自當歸併地方有司或以

贍額未充遂與通融之議但

惠府既統各宗而以產業入贍則其代進

朝貢表箋之費何從取給且郡藩相傳已久似不宜以親王管理而遽行改作也相應出給勘合照舊徵租至于王興就國經年贍田未足宮眷人員眾口待哺何以安王心而隆聖眷搜協並行雖已屢奉

嚴旨仍當再行申飭責成該省撫按務破面情搜查淤隱廢產悉湊充贍檄行隣省刻期協濟共襄

藩業

大典其有九矣既經該藩府具奏前來相應
請恭候

命下臣部照會湖廣布政司將遼藩原留倉洲照
填給勘合令惠王管業仍充

慶賀表箋等項公費咨湖廣巡撫并都察院轉行
湖廣巡按御史速查地土以充贍額嚴檄各省
協濟施行

崇禎元年九月二十日具題本月二十三日奉
聖旨是欽此

題覆湖廣按臣查叅未完京邊疏

題爲欽奉

聖諭事湖廣清吏司案呈崇禎元年十月十六日奉
本部送戶科抄出湖廣巡按御史宋景雲題前
事內稱據湖廣按察司清軍驛傳帶管糧儲道
副使丘履嘉呈照各省監兌衙門俱已奉

旨裁革其一應見徵帶徵各項錢糧俱責成各省督
糧道兼管所有天啓六年分見徵及天啓五年
以前帶徵京邊各項錢糧數目查算完欠將州

縣掌印管糧官員分別叅治等因於崇禎九年
九月二十六日奉

聖旨這未完京邊各官遵依題准事例嚴行查處該
部知道欽此欽遵抄出到部送司案呈到部該臣
等看得邇來軍旅頻仍中外告匱京邊各項錢
糧關係軍

國命脉卽如數依期徵解猶虞不繼乃地方有司
既責在催科而心存怠緩殊失急公之誼難逃
溺職之辜所當查照本部新題事例重加罰治

者也據湖廣按臣宋景雲疏開該省六年分是
徵并五年以前帶徵錢糧已完者批差解官糧
一舉等解過太倉京庫各項折色銀六萬九千
五十七兩九錢二分零京庫本色絹二萬五千
七十六疋零兌軍本色米二十一萬二千三百
六十五石三斗俱各陸續解部交納又三六釐
耗輕費銀三萬六百餘兩存貯司庫將正帶徵
已未完銀兩及漕糧州縣各數目通總計其
各州縣全完與完及分數掌印管糧官員照例

不開外未完一分以上例應降俸一級戴罪
催者漢陽縣掌印兼管糧知縣王良相今管知
縣蔣夢熊巴陵縣掌印知縣袁鶴冲今管知縣
安汝盤管糧主簿周家盛今管主簿文應薦衛
山縣掌印知縣吳之瓚今管知縣黃希孟管糧
主簿倪鶴鳴未完二分三分以上例應降職一
級戴罪督催者廣濟縣掌印知縣張燮任接管
署印蘄州衛經歷王憲中管糧主簿林卿接管
主簿胡應詔華容縣掌印知縣戴文選衡山縣

掌印知縣陳以蘊管糧主簿劉天生今管主簿
陳兆龍來陽縣掌印知縣郭斌述主簿費心學
除知縣王良相被論袁鶴冲降調吳之瑣病故
張燮任丁憂郭斌述大察不及調主簿林卿罷
斥劉天生病故俱各離任無容別議知縣蔣夢
熊安汝盤黃希並署印經歷王憲中主簿胡應
詔文應薦陳兆龍俱接署未久相應免議外見
任知縣戴文選陳以蘊主簿費心學俱降職一
級戴罪督催陞任主簿周家盛倪鶴鳴各降俸

一級既經該省巡按具題前來相應依擬覆

請恭候

命下臣部移文湖廣巡撫及各都察院轉行湖廣巡按御史等衙門除王良相等十四員查係被論降調病故丁憂罷斥離任及接署未久俱應免議外將知縣戴文選陳以蘊主簿費心學各降職一級戴罪督催陞任主簿周家盛倪鶴鳴行見任衙門各降俸一級俱俟錢糧完及分數方准開復仍咨吏部知會停其陞考庶

功令申明人心知警于

國計重有裨矣

崇禎元年十月三十日具

題十一月初三日奉

聖旨是欽此

覆斬民張効勦陳奏疏

題爲虞門大闢遵

詔陳言痛指民害緣陳款目乞蘇父困以暢太平事

湖廣雲南清吏司案呈崇禎二年閏四月二十

七日奉本部送戶科抄出湖廣黃州府蘄州民

張效勦奏陳徵收條編湖租漕務等款緣竊聞

四月十二日奉

聖旨張効勦紊混朝儀已有旨懲處據奏指陳民事

不盡勦襲着卽刻釋放疏內可採事宜所司速與

酌覆該衙門知道欽此欽遵抄出到部送司茶
到部該臣等查得疏內所陳除誣情加等反坐
監察巡行直省應聽刑部都察院查行外其徵
收之禁秤耗條編之議允支漕糧之減加耗湖
池清丈課業漕船挽遲爲速等款卽其議出
蕘實乃憂切時艱感激發憤直陳利弊其中多
有可採在

聖明旣不嫌爲轉環之聽在臣部自當亟爲采菲之
謀相應逐款參酌擬議上
請恭候

命下臣部通行各該巡撫并咨都察院行令各該巡
按御史轉行所屬衙門一體遵奉施行

計開

一徵收秤耗

前件看得徵收之法原當以撫字寓催科
乃漁獵公行幾令閭閻皮骨俱盡貧民額
天無路俛首聽其魚肉不肖有司沿習
智是以

聖明臨御之初亟行首禁臺省交章論列屢次申明

今効勩特以見聞所及者復詳盡言之
日屢奉

明旨申飭省直撫按多以此舉爲第一義分委司理
不時潛詣州縣抽驗銀封較勘法馬若有
力行不倦前弊自可杜絕仍當通行勒石
樹禁大祛宿弊永正官邪以拯斯民於水
火之中者也伏候

聖裁

一額派條編

前件看得條編銀兩原有起運撥運
三款據奏一出一入重復扣剋戕民甚
允宜釐革內差役工食一節查先年原
允支後因衙役橫縱勒索之害甚於加
大不便民而改條編今若允復舊貫恐仍
有積奸夙蠹以狐假虎各役分外苛求
里乘機科派而反爲民厲者且事屬更張
又恐有便于此而未便于彼者胡可執
而論是在地方官酌量便宜行之耳至

起撥錢糧設櫃投單當堂點驗取領
官不拆封何從染指亦似有見但各處
體不同有里表收納者有大戶收納者
有召商及吏役收納者貧富不同貧廉亦
異州縣猶且晚稽查委付恐侵漁難免
執一法而通行之天下難矣若有土俗
情原相宜者自當照行以收官民兩便
効不則仍聽撫按司道相機調停期于

國而便民也伏候

聖裁

一 湖省漕糧

前件看得疏開漕糧額耗加四陡于四斗
六年旗軍串通糧道衙門外加耗米二斗
凡有漕糧如江浙等處俱遵

祖制而湖民獨遭額外之科等因查得單例所開江
西湖廣浙江每正糧一石外加耗米六斗
六升又加兩尖米一斗共米七斗六升內
除四斗隨船作耗餘米三斗六升折銀

錢八分謂之三六輕賈解貯通庫以爲糧脚價之用遵行在卷今江浙皆然而省獨有異同哉恐未必然應行該省撫臣申飭遵照單例徵兌無容再爲增加以致瀆擾伏候

聖裁

一 湖池租課

前件看得湖池升課原有舊額近以事生玩法弛弊茲豪強隱占巧逃

國賦者未必無之効勛身處其地目擊必真因議
酌課定價不使積猾盤據侵漁逋欠是在
通行湖省撫按俾其委任賢能虛公清勤
斟酌裁定務求盡杜隱占侵逋之弊而後
卽安上俾

國計下不病民歲登實課用佐邊糈是亦釐弊屆
時之一議也伏候

聖裁

捷運漕船

前件查得漕糧每年原限十月開倉
月終完兌開幫湖廣江西浙江三省俱限
二月過淮此單例所載不容遲緩者近因
妖梗阻凍以來幾愆一年之期今蒙

聖明督責至切諸臣効忠併力雇船儀兌新運俱
竭蹶備運前來漸可以復舊期乃斯民張
効勛復欲以一船而載兩船之糧并以
船行月糧銀給之在軍既不苦裝運仍
禁不許夾帶竹木枋板等貨利其速行

可剝船一半從容修艙下年可以濟運
議似亦有理但漕船有定額裝米亦有

舊制卽江廣船大而載輕者以其遠涉江湖之險耳
如兩船之糧而併一船給以兩船行月之
餉于旗軍得矣倘重運而遇風濤或阻淺
而不能前進于時終有大不便者非有大
利大害而輕變法未見其可且不許夾帶
竹木私貨屢奉

聖旨申飭不啻再四亦不必再爲議覆者也伏候

重刊

崇禎二年六月十四日具

題本月二十五日奉

聖旨這具覆五款參酌妥當如議行欽此

覆 惠 桂兩藩贍田并新餉照石備累疏

題爲審知楚地時艱謬陳管見仰懇

俞允以早竣 桐封贍典稍甦偏枯殘喘事湖廣清

吏司案呈崇禎二年五月二十三日奉本部送

戶科抄出南京廣西道御史袁燿然題前事內

條奏二款其一爲 兩藩之贍田最難結局

兩王之國將二載矣例共贍田四萬頃屢厯

明旨豈當事者之敢爲遷延蓋楚地山多田少卽所

報之七千頃大半屬有糧之田田無可搜贍養

難待臣作令時每聞搜報

王田之令下官無不攢眉民不得安枕咸曰願如
楚岷等祿徵解成案有司催科百姓無擾

藩府坐享其成今 兩藩贍田每畝三分計之共
該銀十二萬有奇望我

皇上推念楚地原係

肅宗皇帝龍興發祥之區并軫念今日

兩藩并建之苦將此贍田改折祿銀或將十分之
六派之楚省十分之四協濟在福建江西廣西

三省早得結局楚臣早得逃罪其二爲加派之
例未妥照畝加派字內所同照石偏累之苦長
衡永寶所獨乞

勅仍舊照畝加派以均苦樂等因本年五月十五日
奉

聖旨親藩贍典亟宜蚤完加派照石果否偏累該部
酌議詳妥具奏欽此又續奉本部送戶科抄出協
理京營戎政兵部尚書等官李邦華等題爲江
省民困已極 新藩贍制難供謹合詞籲

天懇乞

勅部酌議以昭

聖恩以甦重困事內以江省積貧多藩求豁

新藩協濟等因本年六月十一日奉

聖旨兩藩贍田作速撥給着恪遵前旨該省鄉官不得再請該部知道欽此各抄出到部送司案查本年閏四月十四日奉本部送戶科抄出江西巡按范復粹題爲循例

請賜之國贍典以崇

祖制以隆

聖恩事內稱江省多藩苦貧求免協濟贍田緣繇本
年閏四月初六日奉

聖旨兩藩贍田撥派已久至今尚未竣事前任官違
慢姑不究范復粹卽會同魏照乘作速撥給不得
以該省難措他諉再致稽遲該部知道欽此又該
江西巡撫魏照乘題同前事亦於閏四月初六
日奉

聖旨贍田撥給不得他諉已有旨了該部知道欽此

欽遵俱抄出到部送司該本司呈奉堂批付
西司於五月初七日抄案行文該省訖今該前
因相應通查併覆案呈到部該臣等看得
藩王之國常祿之外錫有贍田蓋

聖朝敦睦之重典也臣等敢不仰體

皇仁黽勉襄事其奈時有今昔勢有易難則奉行者
不無掣肘之虞而調劑者不得不求通融之法
卽今 惠桂兩王就國經年贍田無着七懇

天恩屢廛

明旨乃悠悠至今猶然未見頭緒且先年部覆以每
藩一萬五千爲額故派之於楚者二萬頃江西
福建各四千頃廣西二千頃及奉

明旨槩欲取盈於二萬况 瑞府業有成議則

兩藩四萬之額自難裁減所虧萬頃臣部方議續
派而南臺臣袁耀然已具疏上

請矣臺臣原令安仁目擊楚困深念贍典延遲搜求
無術慷慨論列祈如楚岷等祿徵解成案計四
萬頃每畝三分改折祿銀十二萬兩以十分之

六派之楚省十分之四協濟於福建江西廣西
三省蓋謂苦難而稽

大典不若通融而收實效故望

聖明暫弛加派之禁早結展親之局也戎政尚書李
邦華等與江西撫按魏照乘等先後疏稱江右
地瘠民貧藩多賦重求免協濟呼籲迫切

皇上非不軫念其窮而其如情理難裁奉有

屢旨已定臣部何敢復贅計惟有酌時勢可行委曲

調劑以仰副

優隆至意耳臣等展轉深思贍田之遲爲盡欲需田
也在 兩藩以田隸冊籍方便於徵收在地方
因田費搜求反易於推諉夫搜田加派總由
民間也竊爲 兩藩籌之卽田疇廣布而道里
隔越計畝無過於折色雖供贍急需而催徵督
解歲供必屬之有司額定之田旱潦猶能備日
派分之賦 功令豈容卸擔州縣任其勞而
藩封享其奉於 王至便也卽爲民計括田則或
於井廬有礙偏累故難洒派則僅從賦稅是

衆擎自易搯私橐之錙銖免 王田之駟

民亦便也其四萬頃之數除原所分派尚缺

萬應准 瑞藩分省續加之例而酌以臺臣四

六之請計其疆履廣狹壤地腴瘠封建之有無

多寡因而酌定其分數更念諸省中有力舉難

堪不能按數派增未便株守成說萬不得已

旁及於附近省分再爲通融如湖廣原認二萬

頃合再加四千頃適足十分之六江西原派四

千頃土既磽薄復多 藩封見在控陳求豁不

便加增查福建幅員延袤頗廣且素無藩祿之
累廣西地方素稱貧薄又曾有郡爵之封福建
原派四千頃合再加二千頃廣西原派二千頃
今止加一千頃廣東地方隣於廣西福建土產
頗饒未經封建向來協濟原未議及然王土王
民何妨義起相應亦酌派三千頃以共足十分
之四在湖廣四省加增雖畧有差等各與以力
所能勝在廣東雖不在成議之中或無辭奉公
之義當各仰體

朝廷展親之典無作

藩封膜外之觀者也再

瑞藩贍田陝西所認萬頃俱係攤派非有田畝坐

定何地其封建世守不可無附近庄田撫按疏

曾議及欲於漢中近地再爲搜獻以備官館採

樵之用乃歲月遷延尚無着落若楚省則頗聞

有湖傍淤地雖僅實報七千再一加意搜求無

難足萬頃則較瑞藩更爲便矣相應卽以

給兩王永爲世業而以續派之一萬四千頃

福建等三省之一萬三千頃并廣東新增之三

千頃俱加派改折遵照會典三分起科有司

徵解責藩司極力行催撫按不時查覈若有徵
發獨後拖欠不完者繩以考成之法毫無寬貸
誰敢不爲竭蹶者將見兩藩世守有基租賦
有入何必阡陌相望乃享安富之實卽有司亦
租稅不闕輸將絡繹何至心力交疲空懸搜括
之令哉臣等力綿任鉅經畫無奇竊因臺臣建
議真確通變合宜遂冒昧

上陳亦不復以嫌怨自討矣伏惟

皇上俯加採擇立見施行 兩藩幸甚萬民幸甚

照湖廣加派案查臣部先年原議照肅起科
該銀七十四萬二千四百七十六兩有奇該
撫按復以照肅不均請改照糧每石約三錢五
分逮天啓二年三月內該撫熊尚文又請以題
留贓罰等銀六十二萬三百九十三兩九錢
分抵解天啓二年之餉臣部又念或徵或抵莫
知適從議以撫臣所設處抵補者行於仍額
糧之中每石覆減五分止派銀三錢共得銀

十三萬七千四百二十八兩九錢九分尚少
萬五千四十七兩一錢零於布政司清查題解
前項等銀補額起解姑限五年爲率至五年外
前銀將盡遠餉未蠲聽從撫按奏

請臣部更端另議等因遵行在案今算至天啓六年
已滿五年之期正更端另議之日而該省至今
未見聲說則贓罰抵解之說或未經舉行未可
知也又案查天啓二年十一月內該撫薛貞題
請蠲免潞庄加派銀二萬二千五百八十七兩零長

沙加派銀六萬七千四百一十三兩實留用
餉銀六十五萬二千四百七十六兩一錢六分
三釐九毫合之原派七十四萬二千四百餘兩
之數適相券符則自二項減派外餘俱照舊起
科亦未可知也總因加派銀項改解黔餉以後
該省遂若與臣部渺不相關卽今解黔之數果
曾足額與否臣部尚不及聞就中作何調停也
部又尙能知所當行令該省撫按逐年徹底清
查贓罰曾否抵解額派曾否減損至臺臣所云

長衡永寶四郡照石之苦既屬備累目下應作
何法調劑務要從長酌議具報惟是該省餉額
臣部已改黔餉不可頓減此有所損則彼必有
所益矣似應行文該省撫按責成藩司一併查
議明確但令郡邑之甘苦適均而餉黔之部額
無損則兩便之法也既經南臺等臣具奏前來
相應覆

請恭候

命下臣部行文湖廣福建江西廣西廣東各巡撫并

咨都察院轉行各該巡按御史各將前項贍田
加派事宜行令所屬衙門一體遵奉施行

崇禎二年七月二十六日具

題八月初九日奉

聖旨建藩二載贍田久稽殊厯朕念據奏權宜加派
但賦額畫一卽功令森嚴尚多逋欠若虛懸派額
豈能永遵你部還回該科商酌該省撫臣奏認併
江西福建廣西協濟務足四萬之數各遵分派項
數將在冊現田照州縣大小分撥歲計二稅所入

合原派項畝銀數定爲贍額有司徵解王世世資
給實田旣協典章兼存藩體副朕篤親至意所撥
田賦仍將那派錢糧湊足正供不致虧額一併從
長酌議其長衡等府加派照石偏累該撫按查確
併通融均補具奏欽此

題覆御史譚汝偉衡民萬苦疏

題爲衡民萬苦不啻倒懸敬舉其有便于民無損
于國者仰祈

聖鑒允行以甦民困于萬一事湖廣清吏司案呈崇
禎二年七月初六日奉本部送戶科抄出浙江
道御史譚汝偉題前事內條陳衡民利弊藩祿
宜還等四款緣繇于本年六月二十五日奉

聖旨譚汝偉以衡人言衡便奏內事宜卽與議覆南
運改折不得輕議該部知道欽此又該譚汝偉題

爲地方請命敢補續仰祈

聖鑒批發以救民困事內祈

聖明批發前疏緣繇亦於本年六月二十五日奉
聖旨章奏次第簡發這所奏知道了該部知道欽此

欽遵俱抄出到部送司查得前疏所陳四款除
馬政宜清事隸兵部應聽議覆外其藩祿宜選
一節欲以雍祿抵新封深屬有見南運改折不
得輕議奉有

明旨解漕宜正官一款事關漕務移付雲南司隨

回稱漕運係軍

國重計委用務得其人若驛丞倉巡雜流及候缺
經歷等卑官原不自惜官箴每多弊端可虞
臣所議責之管糧通判誠爲妥確照數具覆無
容再議等因到司准此相應一併議覆案呈到
部爲照 潘封鼎建供億之需頗煩財力易窮
偏枯之累宜軫臺臣譚汝偉身際明時職居言
路北海內地方但有疾苦偏枯之處咸得代爲
疏陳以求豁免况其桑梓之鄉苦累情狀目擊

身嘗安能緘默不言宜其縷陳衡民之苦
調停蘇息兩疏迫切不啻倒懸之求解也臣
敢不仰遵

明旨亟爲議處據 藩祿一款衡邑舊有雍藩祿銀
九千兩雍廢而此銀改抵爲別府用夫謂之祿
銀有藩以奉藩無藩以還民理也改抵則取此
處可裁之物力代他郡應出之供輸非其平矣
第當日 國課無增民財尚裕幸釋

雍藩一切之累遑恤改抵九千之難故相安於無

言也今賦重而民貧矣况維藩儼樹勞費驛
田祿既苦其並徵殿宇將煩於改建衡民所遇
爲何等時不取回舊藩之原派而加增繁重之
新徵是使安閑之處反得以協濟偷安而疲累
之衡立見其皮肉俱盡不但情不能堪而力亦
何能取給也相應

俯從臺臣之請收回以抵桂藩祿銀在衡民若取
其寄而非有所奪在他處若償所貸而可以不
爭民力稍寬藩祿可足惠民卽以重藩矣至於

此既歸還他應派補則酌量裒益務求至當
在地方官之善爲通變耳漕糧徵解上係

國儲下關民命故設管糧通判以主之衡邑漕米

正耗至二萬餘石盤費雜項至二千餘兩責任

殊重迺其部解非見任雜流則候缺閑員也就

中多係卑瑣狡貪鑽管承委搜求陋規以充私

橐及豁壑既已屬厭而解運仍責之民與船戶

旗軍爲貓鼠以包攬幫貼爲吞噬自舟發以至

交卸勒索刁難耽延月日民間罄貨產鬻妻孥

而出者任其徘徊留滯冒險於風濤沙磧之中
偶有不虞重遭賠累皆屬此輩爲祟誠有如臺
臣所言者糧官委以督徵應還付之督解其行
徑當與卑秩不同自愛身名孰肯掛貪污之議
旣持清白肯復容簸弄之奸當不至通同貪肆
腹民膏而妨國計矣若憐其歷險涉遠帆檣
煙水皆服官之時日則程量勞績咨部敘酬以
示鼓舞是在撫按官之加意也至於南糧以陪
京根本之地軍國所需改折談何容易而衡

民與他處不同古來鴈斷遐陬險絕素稱天
今屬桐封重地凋疲堪軫民艱贍祿之供應難
支解運之艱虞轉甚臺臣議請改折節省解費
脚耗以助祿銀計慮苦心呼籲激切因爲地方
祈

恩總爲 藩封起見也

聖明非不矜憫其窮而尤特鄭重其事且南部方苦
襟肘盡露必有不肯慨然允從者姑俟南更流
裕之日不妨再與從長酌議也既經臺臣具

前來相應覆

請恭候

命下臣部行文湖廣巡撫并咨都察院轉行湖廣巡
按御史轉行所司衙門一體遵奉施行

崇禎二年八月十六日具

題本月十九日奉

聖旨是欽此

題議往惠二藩贍田四萬疏

題爲審知楚地時艱謬陳管見仰懇

俞允以早竣桐封贍典稍甦偏枯殘喘事湖廣清吏

司案呈崇禎二年五月二十二日奉本部送戶

科抄出南京廣西道御史袁燿然題前事內條

奏二款其一爲贍田最難結局楚地山多田少

無可搜括官民咸願改折或將十分之六派之

楚省十分之四協濟在福建等三省早得結局

其二爲加派之例未妥願求照畝均平等因本

年五月十五日奉

聖旨親藩贍典亟宜蚤完加派照石果否偏累該部酌議詳爰具奏欽此又戎政尚書等官李邦華等并江西巡撫魏照乘巡按范復粹等各具疏因以江省藩多地瘠求豁新藩協濟等因俱奉有明旨各抄出到部送司通查呈部該臣等議以贍田四萬頃除原所分派外尚缺一萬應准

瑞藩分省續加之例從臺臣四六之請於原議三省酌加又以附近一省增派以合

欽定之數實田七千搜足萬頃用充

二王世業其加派照石徧累行文該省責成該藩
司查明均適等因于本年八月初九日奉

聖旨建藩二載贍田久稽殊厯朕念據奏權宜加派
但賦額畫一卽功令森嚴尚多逋欠若虛懸派額
豈能永遵你部還同該科商酌該省撫臣奏認併
江西福建廣西協濟務足四萬之數各遵分派頃
數將在冊現田照州縣大小分撥歲計二稅所入
合原派頃畝銀數定爲贍額有司徵解王世世資

給實田既協典章兼存藩體副朕篤親至意所
田賦仍將那派錢糧湊足正供不致虧額一併從
長酌議其長衡等府加派照石徧累該撫按查確
併通融均補具奏欽此臣部方在會同科臣從長
熟議間又該戶科抄出湖廣巡撫洪如鍾等會
題爲

兩藩需贍甚急三楚搜括甚難謹遵

明旨攤派足額以完

大典事內稱楚屬地不加闢田無可搜惟有酌量攤

認以全原額計畝徵銀藩司類解以完贍局等
因本年八月初九日奉

聖旨這兩藩贍田分派州縣照數自認雖可充額但
田屬虛懸後有逋欠何以贍用部科還從長確議
具奏江西福建廣西原派頃數該撫按作速搜查
奏報不得遲慢取罪該衙門知道欽此又該湖廣
巡按宋景雲題同前事本年八月十五日奉

聖旨已有旨了該部知道欽此又該

惠王常潤奏爲豪宗蔑

旨欺

君違禁隱占遺業大肆強梁戕殺多命事內奏光澤
舊宗術誣不遵約束隱占遺淤乞

勅清丈湊贍緣繇本年八月十六日奉

聖旨覽王奏術誣隱占遺業併潛踪誣赫等事着該
撫按查明具奏一面嚴諭各宗遵王約束不得撥
置恣肆贍田時厯朕懷屢旨撥給前派各地方官
還不時行催早完大典該部知道欽此欽遵俱抄
出到部通送到司案呈到部臣等遵奉

明旨會同科臣解學龍展轉計慮徃復叅詳積思慎

重未敢草草敬以會議管見爲

皇上陳之竊照贍田四萬頃之數臣部及楚之撫臣
按臣俱以派折請而咸未蒙

俞旨

聖明幽隱異照豈不知田無閒空而民產難割哉誠
念一行派折則旱澇不常必有逋欠追徵稍玩
遂致缺供

聖明睿慮識遠計周必使兩藩田疇廣布廼樹建
國之洪基租賦常饒始受

展親之實惠故欲先以現田充撥給而徐以那派補
正供耳臣等仰體

德意自當祇奉惟謹第有轉深思而轉覺未易得當
者派虛畝恐歲入參差既凜凜於

明綸之確撥現田則羣情驚愕更颯颯於時勢之艱
兼以各省物力難齊協濟尤煩區畫此非求其
事理之宜合以通融之法安能上副責成使贍
額蚤完也三楚幅員頗廣臣部止議二萬四千
頃者切見今日邊疆多事差煩賦重之苦海內

所同至於

兩藩並建騷然煩費者惟三楚獨也百姓貧瘠難支有司追呼不應百凡徵解俱爾後時卽如黔餉一項積欠至五十八萬臣部見今檄行催督而目前以歲歉不登流離望賑者且七郡見告楚之爲楚可知矣今所責以供給贍田之民非卽此逋欠待賑之民乎而田奚可望其加多也撫臣洪如鐘自認派畝足三萬頃較臣前議多至六千緣搜括之實田難而攤派之虛畝易也

撫臣恐難結局於實田故寧廣額於虛派不知
聖明加惠懿親所重原在期有實田臣與科臣庸見
竊謂虛數不必加增於楚而實田不容不責備
於楚盡力於所可搜而後求通變於所不足庶
幾可行也今楚已報實田七千頃或係瀕江淤
長或係舊藩遺業尚有

惠藩疏稱隱占行文查追此皆環附於荆者用以
備 惠藩之田園館舍以及樵採之所需自可
承爲世業矣衡郡去荆千數百里以荆田分給

桂藩迤里隔遠安所用之若不亟爲設處無論
兩藩異同非體且一建邸之外不享衡土尺寸之
奉 桂藩卽賢明謹飭體恤時艱能一切供應
俱取辦遠地而晏然相安於衡乎臣等訪之縉
紳詢之道路衡郡係雍藩舊封當時必有供贍
莊田環列衡壤而園池苑囿塢榭亭室所爲備
維藩之體者當亦不乏今豈遂無遺項故址爲
父老所傳聞樵牧能指點者乎是在委任專官
加意博訪有舉首者毋混坐投獻以塞清查之

路則尋求自易卽不能及附荆七千之數或亦
不下四五千頃隨其所獲卽可資給

桂藩永貽世守俾令丕基鴻業荆衡相望臣等亦
知民間分據已久取之不無怨望然以藩封故
物還之藩封追取者不爲生事捐棄者亦可平
情耳至於集合荆衡實田恐於二萬四千頃內
猶多缺額倘以在冊現田撥補而能上下相安
臣與科臣何憚而不恪遵

成命者惟是再四籌之揣度民情繹思

明旨按冊而派周編戶事體零星撥田而情駭見聞
閭閻騷動乃那派仍出小民而補賦更滋煩擾
切又不敢稱爲便計若果照畝徵銀不問虛派
實撥責成總屬州縣似與

明旨所云有司徵解者適相符合矣夫逋負之多少
係法令之寬嚴以藩折人之考成與京邊同叅
罰誰敢秦越相視而罪譴自甘者且錢糧之多
逋必緣水旱爲災流亡憐目催科窮於無術非
盡闕無實田也政不必懲於逋負而慮懸派之

難行也且

兩藩與

瑞藩事體相同今查

瑞藩贍田俱係懸派時尚未有實畝

兩藩既各享實田已較瑞藩爲便似更不必求

盈搜括相應仍聽撫按照州縣大小派補實田

不足之數每頃正耗三兩六錢如撫按所議徵

解藩司按時類解將見土田所出於肘腋獲租庸之

用派折所入使郡邑任輸輓之勞三楚贍田之額

無慮不足矣其江西等省協濟則地方與楚隔

越有至數千里者撥田尤爲不便無俟臣言

贊計無過辦疆土之廣狹肥磽查封建之有無
多寡以爲差等合謀熟慮前疏已悉無能更出
意見伏望

皇上俯容臣等再申前議江西土瘠多藩原議四千
頃不能加多福建雖稍稱沃壤且無藩封而近
日海寇未靖人心震警加至六千無容更益廣
西則地狹民貧量加至三千已屬勉強合之尚
少三千頃不足四萬更有何術可以取盈故廣
東原未在議而前疏欲通融增入同係王土事

在急公且其疆域可與福建相當而派額從
廣西同例當自不爲作苦蓋不得已而爲此
變之法也執守成議以示畫一固見

皇上四時之信通一時之權宜蘇各省之苦累尤
皇上天地之仁其均攤徵解之法說已詳於楚派
如是而贍額可完前局可結矣

兩藩享有土田而款額補之派折所以通法制之
窮每歲無虧供贍而轉輸責之有司且以明
藩體之重竭臣等之愚衷叅科臣之酌議乃敢

上請乞

皇上神明天授深識遠覽倘不以臣等之言爲無當
勅行湖廣撫按除附荆已報土田及續查別宗隱占
外速行衡郡擇委風力訪求雍落遺業務與附
荆實田大率相當姑俟畝數已定具冊疏

請分給此外另照州縣大小派折補足二萬四千頃
之數江西等省行令各照派額均攤州縣共是
四萬如議徵解以速久稽之盛典仰副

篤親之德意將見

恩隆藩服歲勤五省之輸將基固

天潢世享千年之安富矣

崇禎二年十一月二十四日具

題崇禎三年二月十二日奉

聖旨兩藩贍額撥給實田奉旨已久各該撫按通不
遵依故意延遲好生可惡着遵前旨亟蚤完結不
得懸派再遲必罪本內頃字錯寫畝字改正行欵
此

題覆川貴總督南糧耗脚疏

題爲南糧耗脚部文前後互異伏乞

勅部定議以濟急需事湖廣清吏司案呈崇禎三年正月十二日本部送戶科抄出總督貴州四川湖廣雲南廣西軍務兼督糧餉巡撫貴州湖北湖南川東偏沅等處地方少保兵部尚書兼都察院右都御史朱燮元題前事內稱楚省南糧耗脚米十萬四千石折銀伍萬貳千兩協濟黔中奉自部覆今據楚中藩司詳稱部議停免

自合具題移咨到黑別以一項抵補前數未
另行撥補小民間風悍然不納有司借口徵解
不肖黔餉愈詘臣謹會同湖廣巡撫洪如鍾
合詞上

請伏乞

勅下戶部或仍遵原議將耗米每石折銀伍錢餉
或另撥別項以補黔中缺額等因崇禎二年十
二月初六日奉

聖旨戶部知道欽此欽遵抄出到部送司案呈到部

該臣等查得自黔中多事措餉惟艱廷臣集議將南糧正耗米一槩折銀協黔臣部舊有成說後于天啓五年間因楚民吳亨三等赴訴以楚困難堪引隆慶三年南糧改折之例正耗每石共折銀五錢前部臣爲閭閻窮黎起見疏

請允行然於餉黔實額未免有損當此三空四盡苦無別項可以撥補而黔中之餉又未可以使缺額則安得惜一方之皮骨掣全黔之襟肘合宜仍遵舊額正耗並徵轉解充黔俾其不虧原派

不必另請增加蓋本色折色其勞費懸殊今楚糧幸得改本爲折足矣免風波盤運之艱耗原應並折况獲數年停免之利物力久受其實當亦欣然竭蹶無難也相應速行湖省撫按督令該布政司揭示糧里如期輸納毋庸紛議既經督撫等臣會議具疏前來相應覆

請恭候

命下臣部咨行貴州湖廣各巡撫并咨都察院轉行各該巡按御史一體遵奉施行

崇禎三年正月十九日具

題本月二十一日奉

聖旨道南糧折銀照舊解貯如議行欽此

題覆 惠桂二府江西贍田疏

題爲照例搜查協濟贍田銀兩事湖廣清吏司案
呈崇禎三年正月二十七日奉本部送戶科抄
出江西巡撫魏照乘題前事內稱據江西布政
司詳稱本省奉文協濟

惠桂二府贍田四千頃每畝三分該徵銀一萬二
千兩萬不得已將官役經費之中再加節縮共
止得銀四千八百一十一兩九錢四分四釐四
毫其餘於驛傳項下先截七千一百八十八兩

五分五釐方毫以足贍田一萬二千之數
到臣該臣會同巡按范復粹看得贍田一項久
無成議雖地無從出而搜括裁減可竣

大典况裁汰以抵贍田山西久已報竣逐額稽覈約
得數千益以裁扣之驛傳銀兩可不加賦而贍
租足焉江民永免加派之苦則亦該司搜查之
功也伏乞

勅下戶部議覆將此搜查銀兩查照抵充贍田租銀
以崇禎三年爲始行令各屬解司轉解仍將來

項載入考成全書明載改編等因崇禎三年正月二十四日奉

聖旨據奏搜查銀兩抵充兩藩贍租着該部確議速覆欽此又該江西巡按范復粹題同前事本年正月二十五日奉

聖旨已有旨了該部知道欽此欽遵各抄出到部送司案呈到部爲照兩王就國三載于茲議協濟議派徵費幾許籌畫猝難就緒祇緣時值艱難搜田掣肘爲此萬不獲已之計臣部先已會

同科臣熟議具有覆疏 進呈雖尚未奉

俞旨而揆理度勢往復叅詳原以實田責備楚中而
以協濟望之隣省今該江省撫按藩司凜承

屢旨切念 親藩懿典不敢久稽搜查不厭纖裔缺
額借資驛傳適足

欽定之額查其所稱節縮如三司會禮銀諸款四千
八百兩有奇俱從官府樽節無與民間極爲妥
便至於從驛傳裁額之內取七千一百八十八
兩以足其額揆諸情理更爲得宜蓋江西閩省

驛傳奉

旨十裁其六爲數不下數萬兩在

朝廷蘇息窮黎不難裁驛遞有常之供還其數萬在
百姓共襄

大典何憚從蠲除累萬之內用其數千於

皇上加惠懿親體恤民隱之至意業已克副而兩全
矣是其勉承力索首先告竣以爲諸省倡皆在
事諸臣苦心竭屨之效也據疏稱搜銀抵贍晉
中協秦已有成例伏乞

聖慈體念時艱俯從所請將前項搜出銀兩准令
派編州縣按年類解輸楚分給

兩藩其考成之例當與京邊一同叅罰繩以

功令催徵應不後時增入全書萬禩永爲定額如
是則閭閻免搜田之擾藩府享租賦之成而
閩廣諸省亦必效例義起瞻田久延之局刻期
可告竣矣既經該省撫臣會題前來相應覆

請恭候

命下臣部咨行江西湖廣各巡撫并咨都察院轉行

各該巡按御史一體遵奉施行

崇禎三年正月三十日具

題二月十二日奉

聖旨兩藩贍額已有旨撥給實田不得另議搜抵
遲取罪該衙門知道欽此

催請速發題覆贍田疏

題爲恭請

速發覆疏蚤竣

桐封贍典事湖廣清吏司案呈崇禎二年八月十六日奉本部送戶科抄出本部題覆南京廣西道御史袁燿然題爲審知楚地時艱等事內條奏一款爲贍田最難結局又原任戎政尚書李邦華等江西巡撫魏照乘等各疏俱奉

旨下部該臣等查議以分省攤派具覆崇禎二年八

月初九日奉

聖旨建藩二載贍田久稽殊厯朕念據奏權宜加派
但賦額畫一卽功令森嚴尚多逋欠若虛懸派額
豈能永遵你部還同該科商酌該省撫臣奏認併
江西福建廣西協濟務足四萬之數各遵分派項
數將在冊見田照州縣大小分撥歲計二稅所入
合原派項畝銀數定爲贍額有司徵解王世世次
給實田旣協典章兼存藩體副朕篤親至意所撥
田賦仍將那派錢糧湊足正供不致虧額一併從

長酌議其長衡等府加派照石偏累該撫按查
并通融均補具奏欽此又該湖廣巡撫洪如鍾等
會題三楚搜括甚難酌量攤派以足贍田又
惠王常潤奏查隱占遺淤各緣繇俱奉有

明旨抄出到部該臣等會同科臣解學龍展轉計慮
徃復叅詳確凜

明綸酌體時勢求其事理之宜合以通融之法楚田
臣部止議二萬四千頃而撫臣自認派畝三萬
蓋為搜括之實田難而懸派之虛數易也臣

科臣等議則謂虛數不必加增于楚而實田
得不責備于楚從來藩封鼎建未有無附道
田者今楚中見報之畝皆附近于荆以之給

惠藩則事理稱便矣若衡之去荆千里而遙以荆
田而給

桂藩安能得其用乎堂堂

親藩一建邸外無尺寸之土恐

桂藩雖賢明謙讓未必能相安于無事也查衡州
原有雍藩遺業踪跡可求當亦如荆之舊藩

獨置爲不可問乎亟口尋官博訪故址隨其賦
獲資給

桂藩以爲世守庶可稱平情且至於實田悉索之
外果無餘地額猶未足乃不得不曲爲通變計
懸派未敢稱便惟照畝易於輸銀與

明有司徵解之

旨適相符合其各省協濟道里隔越撥田更屬未易
合申前議江西土瘠多藩原議四千不能加多
今撫按藩司已設法裁扣如數上

請矣福建稍稱沃壤而無藩封但近海寇震驚加至
六千無容更益廣西地狹民貧加至三千已屬
勉強合之尚少三千無術取盈廣東原未在前
而前疏欲通融增入因其疆域可與福建相當
而派額僅與廣西同例當自不作苦耳各省之
數或聽將州縣均攤或亦如江西別有裁扣從
其便宜將次第足額如是贍典可完前局可結
矣謹竭臣等愚衷叅以科臣酌議乃敢上

請乞

勅下湖廣撫按除附荆已報田土及續查別宗隱占
外速行衡郡擇委風力訪求雍藩遺業務與附
荆實田大率相當姑俟畝數已定具冊疏

請分給此外責成撫按速行設法分派補足二萬四
千頃之數刻期奏

請其福建等省俱立定期如數徵解速襄

盛典等因於崇禎二年十一月二十四日具疏
進呈迄今未奉

明旨豈前疏處分未當

聖心或欲別有措注乎抑以逆酋犯順羽檄郊馳
宵旰焦勞或

萬幾之無暇乎惟是瞻典久懸

聖衷親親之念未釋

兩王維翰之基未成臣等何所逃罪謹列覆疏

節恭塵

聖覽倘不以臣言爲無當

特簡原疏速賜

頒發

明旨俾臣等轉行遵奉施行

崇禎三年正月三十日具

題二月十二日奉

聖旨已有旨了欽此